



Gabungan 4 persatuan jayakan *UMP Family Academic Tour* untuk anak-anak staf

Dalam memanfaatkan cuti persekolahan baru-baru ini, seramai 129 anak-anak staf Universiti Malaysia Pahang (UMP) yang berumur dari tujuh hingga 18 tahun menyertai program *UMP Family Academic Tour* bagi memberi pendedahan kepada anak-anak staf mengenai persekitaran pembelajaran di menara gading.

Program sehari anjuran bersama Persatuan Staf Akademik UMP (PAKAD) ini mendapat kerjasama daripada Persatuan Kesatuan Kakitangan Sokongan UMP (KESUMP), Persatuan Pegawai Tadbir dan Ikhtisas UMP (PPTI), Badan Kebajikan dan Sukan Staf UMP (BKSU) dan Persatuan Wanita UMP (Matahari) telah diadakan pada 23 Mac yang lalu.

Presiden Persatuan Staf Akademik UMP (PAKAD) yang juga pengarah program, Dr. Adzhar Kamaludin berkata, program bertujuan untuk memberi peluang kepada anak-anak staf UMP untuk mengetahui bidang-bidang utama di universiti ini dan melihat sendiri kemudahan dan kelengkapan makmal di fakulti.

“Jika selama ini anak-anak hanya mengetahui ibu atau bapa mereka

berkhidmat di sini, maka pada kali ini mereka berpeluang sendiri untuk masuk melihat dan memahami suasana pembelajaran dan persekitaran universiti ini. Pada kebiasaannya, UMP hanya menerima para pelajar sekolah dari seluruh negara namun pada kali ini peluang turut diberikan kepada anak-anak staf untuk memupuk minat mereka dalam bidang teknologi dan kejuruteraan,” katanya.

Beliau berbangga dengan komitmen empat persatuan di universiti ini yang sama-sama berganding bahu dalam menjayakan program ini dan mengharapkan program ini akan memberikan suntikan semangat kepada anak-anak untuk belajar dengan bersungguh-sungguh.

Menurut seorang peserta program, Nur Najwa Atirah Norazmi, 8, berkata, pengalaman cuti sekolah kali ini amat bermakna apabila berpeluang meneroka dan menimba ilmu pengetahuan baharu. Walaupun ibunya telah bekerja di UMP hampir 10 tahun namun ini merupakan peluang pertamanya berpeluang melawat makmal, fakulti dan sekitar universiti.

Beliau yang amat teruja dalam program lawatan ini berkata, lokasi yang

paling seronok dikunjungi adalah Makmal Pusat Bahasa Moden & Sains Kemanusiaan (PBMSK) kerana penerangan dan peralatan komputer yang terdapat di makmal seperti perisian *Tell Me More* amat menyeronokkan.

Manakala bagi Muhammad Al Hazree Abd. Latip, 7, berbangga kerana walaupun pernah berkunjung ke pejabat ibu dan bapanya yang bekerja di UMP, namun kehadirannya kali ini memberikan lebih banyak pengalaman.

Lokasi yang paling diminati adalah di Galeri UMP yang menyimpan sejarah dan gambar-gambar yang menarik sejak universiti ini ditubuhkan. Malahan beliau turut menyimpan hasrat untuk belajar dengan lebih bersungguh-sungguh agar impiannya untuk melanjutkan pengajian di universiti ini akan tercapai suatu masa nanti.

Dalam program ini, anak-anak berkesempatan melawat lima makmal iaitu Fakulti Kejuruteraan Kimia & Sumber Asli (FKKSA), Fakulti Kejuruteraan Awam & Sumber Alam (FKASA), Fakulti Sistem Komputer & Kejuruteraan Perisian (FSKPP), Pusat Bahasa Moden & Sains Kemanusiaan (PBMSK) dan Galeri UMP.